

Uunga siunnersuut: Suliffeqarnermi innersuussisarneq il.il. pillugit Inatsisartut inatsisaat nr. Xx, xx 2014-imeersoq
(Inuussutissarsiornermut Aatsitassanullu Naalakkersuisoq)

Saqqummiussissut
(Inuussutissarsiornermut Aatsitassanullu Naalakkersuisoq)

Siullermeerinninneq

Matumuuna suliffeqarnermi innersuussisarneq pillugu Inatsisartut inatsisissaannut siunnersuut saqqummiutissavara.

Siunnersuut saqqummiunneqartoq annertunerpaatigut suliffeqarnermi innersuussisarneq pillugu Inatsisartut peqqussutaannit atuuttumit 2004-imeersumit issuaaneruvoq. Kisiannili inatsisip atuuttup taassuma ilaanni allannguuteqartitsinissaq pisariaqarpoq, pissutigalugu nuttarnersitsiniarluni tapiissutinik tunniussinissamut periarfissani naapertuutinngitsumik killilersuinertaqartoq paasineqarmat. Siunnersuutip matuma atuutilernerani assersuutigalugu aalisakkerivinnut assigisaannullu piffissani suliffiusartunut siumut utimullu angalanissamut tapiissuteqartarnissaq ajornarunnaassaaq. Ukiut marlussuit kingulliit ajornartorsiut aningaasanut inatsimmi oqaasertaliussatigut iluarsineqarsinnaasimavoq.

Qaaguukkut nuttarnersitsiniarluni tapiissutinik tunniussisoqarsinnaanersoq sinaakkutissanik allannguuteqartitsinissamut siunertaavoq, Kalaallit Nunaanni suliffeqarnermi ataatsimut isigalugu siuarsaanissaq. Siunnersuut siunnerfiup taassuma angunissaanut periarfissanik pitsanngorsaassaaq, aammalu Kalaallit Nunaanni suliffissat nunaqavissunut sumi najugaqarnerat apeqqutaatinnagu neqeroorutigineqarsinnaaneritut qulakkeereqataassalluni.

Aamma siunnersuut ilaatigut aalisakkerivinni inuussutissarsiornermi atugassarititaasunik pitsanngorsaannermut iluaqutaassaaq, tassami ukiorpasuarni – aalisakkeriviit ilaanni – aalisakkerivinni piffissani ulapaarfiunerpaasuni sulisussanik naammattunik piginnaaneqartunillu pissarsiniartarneq – ajornakusoorsimavoq – ajornavissinnaasarsimallunilu. Siunnersuut manna sulisussat nuttarsinnaanerannut tunngavissiissaaq taamaalillunilu aalisakkerivinni sulisussaqaarniarnermik qulakkeerissalluni, tamatumalu aalisakkerivinni aalisakkanik tunineqartunik suliarinnissinnaanissaq malitsigissavaa, taamaalillunilu sulisussaaleqineq pissutigalugu aalisakkanit pisuussutit maangaannartinneqarnissaat pinngitsoortinneqassalluni.

Taamatut oqaaseqarlunga oqallilluarnissamik kissaappassi.